

四庫全書

史部

欽定四庫全書

史部

欽定大清會典則例卷一百十八

詳校官檢討臣劉 烜

編修臣程嘉謨覆勘

總校官原任中允臣王燕緒

校對官中書臣朱 烜

謄錄監生臣曹師曾

欽定四庫全書

欽定大清會典則例卷一百十八

兵部

職方清吏司

公式三

綠旗

一章奏文冊順治初年定提鎮將慶賀表箋遺
忘推諉不奏或將字樣舛錯遺漏者罰俸一年

不列職名失用印信及用印歪斜模糊顛倒繕
寫潦草破裂染汚者罰俸六月。又定武職各
官一應文移皆鈐用印信無印信者鈐用關防
條記均編列號數封發不許擅用空白致滋假
捏增減之弊若有擅用空白者罰俸一年督撫
提鎮不能察出者罰俸六月。康熙十一年題
準提鎮本章緊要之字貼黃內遺漏貼黃所有
之字本章內遺漏或疏冊互異者皆罰俸三月

○又議準提鎮將督撫職掌之事擅自題奏者
罰俸三月越叅文職者罰俸一年所叅之事不
議○又議準提鎮有不繫密事妄稱密奏及借
公行私以私事具奏者降二級調用至一應本
章有不應密而密者罰俸六月○又議準前任
官題奏準行之事續經題奏停止後任官不察
停止緣由仍照舊行者罰俸六月○三十八年
議準提鎮不許於遺本內薦舉屬官○四十二

年議準督撫提鎮會題之事有因錯謬遲誤奉
旨議處者察明何繫承行具題何繫列名具題分別
輕重議處如承行具題官例應議以革職者將
列名具題官降四級調用承行具題官降級調
用者列名具題官降一級留任承行具題官降
級留任者列名具題官罰俸一年承行具題官
罰俸一年者列名具題官罰俸六月承行具題
官罰俸六月者列名具題官罰俸三月承行具

題官罰俸三月者列名具題官免議。又覆準督撫提鎮會議之事並未會議畫題遽稱合辭具題者罰俸六月。又議準革職降級之武職各官以冤枉控告者如果有冤枉該督撫提鎮方許題奏如將並無冤枉之事溷行題奏者將督撫提鎮降一級留任轉詳官降二級調用若將並無冤枉之事並不詳察推卸咨部者將具咨之督撫提鎮罰俸一年。五十三年議準各

省提塘除傳遞公文本章並奉

旨科鈔事件外其餘一應小鈔槩行嚴禁違者照刷
造小說淫辭例革職治罪。雍正五年議準凡
提鎮本章事關緊要者將副本揭帖用密封字
樣封固傳遞通政使司咨呈各部院公文有關
緊要之事者亦密封傳遞在京各部院有緊要
之事咨劄各省提鎮亦密封發遞該提鎮親拆
收貯至提鎮與督撫並屬官往來公文繫緊要

之事亦用密封投到親拆收貯如將應密之事不密以致漏洩重者降一級留任輕者罰俸九月。六年議準提鎮辦理大小公事均用題本鈐印本身私事均用奏本不準鈐印如有應用題本而用奏本應用奏本而用題本者罰俸三月。七年議準保題官員督撫提鎮有應列名會彙者出具會題印結隨本送部。又議準提鎮等題奏本章如奉

旨飭行者遵

旨飭行若奉

旨交部察議者將該提鎮等照在京各衙門錯誤本

章例罰俸一月。九年奉

旨文武官有將地方不可施行之事妄行條奏舉行經
後人復請更改者將原奏之人交部議處倘原奏本
是而後人妄行指摘或有意翻案者經朕察出亦必
從重議處將此永著為例。十一年議準提鎮摺奏

之事奉有

硃批諭旨於下次奏事之時封固恭繳倘任意遲延及隱匿不繳者革職。乾隆三年奏準提鎮病故任內應繳

硃批諭旨有子孫隨任者於原任省分呈送就近之督撫提鎮代為恭繳子孫在他省者於所在省分呈送就近之督撫提鎮代為恭繳至休致降革提鎮任內奉到

硃批諭旨有應繳者呈送就近督撫提鎮代為恭繳

其降革來京候

旨之提鎮有應繳

硃批諭旨呈部代為恭繳。又議準提鎮密封陳奏

之事關繫重大若彼此關通商酌以致漏洩一

經發覺按事輕重議處。四年議準武職各官

來往文移及呈報上司事務均於正面及年月

之上鈐用印信內有黏補字樣及增注錯落接

扣之處皆以印信鈐蓋有漏用者罰俸一年。
五年議準武職衙門有印信者於封印前一日
酌量應需文冊封套牌劄等項之數準將印信
豫用空白加謹收貯以備封印後遇有緊要之
事填用仍登記用過數目開印日將未用者驗
明銷燬如收用不謹以致濶冒作弊按其事之
大小照例議處不能察出之上司罰俸六月。

十三年

諭向來各處本章有題本奏本之別地方公事則用
題本一已之事則用奏本題本用印奏本不用印
沿自前明蓋因其綱紀廢弛內閣通政使司借公
私之名以便上下其手究之同一入告何必分別
名色著將向用奏本之處槩用題本以示行簡之
意將此載入會典欽此。又議準各省提塘鈔發
本章必須謹慎有應密之事必竝科鈔到部十
日之後方許鈔發如有邸報先於部文者該督

撫將提塘叅處。十八年

諭元旦長至萬壽三大節外省文職臬司以上武職副將以上例得隨進表箋稱賀朕思督撫提鎮封疆大吏事皆專達表賀為宜藩臬副將既不得專達章疏其由督撫附進表箋亦可不必且不過由部送閣存貯並不呈覽此亦向來虛文陋習甚無取焉其槩停止欽此

一儀制康熙十四年題準

車駕巡幸所過地方守備以上等官接送之處臨時
由鴻臚寺具奏請

旨如所定里數之內有一次不到者罰俸一年兩次
不到者降二級調用。三十三年奏準提鎮

勅書內閣撰出由部發給該省提塘領交。又議準
提鎮到任前一日署事官將印信關防等項遣
官齎送。又議準武職各官將

勅書

誥命質當者革職其

勅書

誥命及劄付關防收藏不謹以致朽爛並損壞者罰

俸六月如被水火盜賊毀失者免議均仍補給

○又議準武職各官印信模糊不詳請鑄換者

罰俸六月督撫提鎮不據詳題咨者亦罰俸六

月若已換新印不將舊印繳部者亦照此議處

○三十九年覆準官兵人等越分僭用服色如

五爪龍立龍團補服之類者繫官革職繫兵枷
一月責四十板僭用之物入官未經察出之專
管官每案罰俸三月兼轄官每二案罰俸三月
統轄官每三案罰俸三月僭用尋常服色者繫
官罰俸一年繫兵責二十板未經察出之專管
官每案罰俸一月兼轄官每二案罰俸一月統
轄官每三案罰俸一月。四十二年覆準武職
各官於應用朝服之日不用及違例錯用者罰

俸一月。又覆準外任武職各官辭朝不投職
名者罰俸三月。五十年議準提督有事故離
任印信交總兵官署理總兵官有事故離任印
信交副將護理如該鎮未設有副將者即交叅
將護理。○雍正三年

諭各省督撫提鎮頒有王命旗牌所以重節鎮之權崇
天室之威也但傳守既久或遇地方卑濕蟲蛀漆剝
或因閱歲滋多形製毀敝而該督撫提鎮以王命旗

牌損壞例有叅處但藏之神筭不敢修整甚有豫防
損壞將所頒王命旗牌收貯照樣別造者尤為不可
嗣後各督撫提鎮所頒王命旗牌務須加謹收護勿
致損傷亦不得別造其有地方卑濕閱歲滋多不免
蟲蛀漆剝形質毀敝者從寬免其處分聽其一面照
式整修一面咨部欽此。四年

諭武職有整飭營伍操演兵丁之責理宜服習騎射為
士卒先近聞副將游守等官竟有乘轎不乘馬者習

安養惰莫此為甚且身為武臣而以乘馬為勞與職
守大相違背何以訓練兵丁嗣後副叅游守等官槩
不許乘轎以長怠惰之習倘有不遵該督撫提鎮即
行指名題叅欽此。十三年議準盛甲旗燾軍裝等
項除考驗日期及本管大員經過察點準其穿
戴披執外至一應

欽差及往來大員經過之時該營汛弁兵有違例披
執迎送者將該管官罰俸一年。又

諭凡標營大小武職均係職典戎行有官守之責至於執事應差之人悉皆入伍兵丁非如文職之書吏皂役可比皆當愛惜其力以備營伍之用朕聞外省提鎮赴任時第一次批令千把總率兵役數十名及儀從等物越省遠迎第二次則令守備率兵役百餘名迎至交界第三次則繫中軍官率兵數十名沿途迎候至於副叅游守等官其所轄弁兵等有至交界處迎接者有至舊任駐劄處迎接者新官赴任常無定

期以致弁兵在外淹留曠廢職守且塗次資斧非動
公費即出已資公費乃軍裝器械之需已資乃仰事
俯育之項以迎迓之虛文耗公私之實用此等陋習
不知起於何時遂至今相沿未改此提鎮等不能體
朕愛養弁兵之心之一端也著該部傳旨嚴行禁止
並將如何迎接之處斟酌定議俾大小武職遵守通
行倘有違越不遵者並嚴定處分以示懲儆欽此遵
旨議準提鎮赴任所屬官弁於是日迎接除隨役外司

事兵丁不得過十名出城不得過五里副將叅游等官赴任本標官弁於是日迎接除隨役外司事兵丁不得過五名出城不得過三里至從境內經過者止許在本管營汛經過處迎接如大小官弁違越不遵者皆照例議處。乾隆元年

諭督撫有節制重寄而提鎮乃彈壓大員凡到任離任及因公出境入境例應具題者所以慎職守重

封疆也川陝江西等省提督與總督隔省駐劄遙
遠無赴省相見之例惟雲南廣東福建浙江等省
因赴任之初由省而見總督者有因巡察地方離
省不遠順便謁見者蓋因苗疆重地或濱海要區
當日軍務倥傯海氛未靖之初是以不行題達竟
赴省城與總督面商機務此乃一時權宜遂爾相
沿成習此時若不酌定恐大小官弁視為固然徒
長奔競之風而不顧職守之曠誤與否是不可不

防其漸也嗣後提鎮之與總督若繫尋常事祇許
文移往來如有緊要公務必須親見總督面言者
或總督有應行檄調面議者均將因公起程及回
署日期繕疏題明至所帶兵役不得過三十名免
致兵丁擾累汎守空虛永著為例欽此。五年奉
旨武職專司營伍騎射是其本分向因偷安坐轎並
不乘馬曾蒙

皇考頒發諭旨嚴行禁止煌煌

聖訓自應永遠欽遵乃近聞江南武職復蹈從前陋習
多不乘馬自副叅以下至都司守備皆公然乘坐
四轎甚至有前呼後擁喧耀街衢者江南如此他
省諒亦不免夫人情習於勞則精神振作習於逸
則志氣萎靡况身為武職而憚於乘騎開驕惰之
端啟廢弛之漸又何以飭戎行而率士卒乎各省
督撫提鎮務將朕旨通行申飭如仍不遵奉即指
名題叅交部議處欽此。六年奏準副叅游都守

等官習安養情並不乘馬擅自違制乘轎者革職。又奏準官員帽頂補服坐褥各照本身見任品級不許計算加級違者罰俸六月該上司失察者罰俸三月其補服頂帶不相符者亦照此例議處。又奏準屬官多帶兵丁越境迎送上司有因事營求或乘便賄賂者革職提問如止出境迎送並無營求賄賂者罰俸九月至上司必欲屬官越境迎送屬官畏其威勢迎送者

如有勒索情弊或被屬官詳揭或經督撫叅劾將上司革職提問如止令迎送無勒索情弊者罰俸一年其迎送之屬官免議。七年奏準在外提鎮以下副將以上見任來京者若並無疾病事故凡值祭祀耕藉之期先期在附近地方齋宿仍聲明齋宿處以憑稽察屆期投遞職名各按品級隨班行禮若有事故不能齋戒者聲明填注至遇

皇上御殿受賀諸大禮亦一例隨班行禮提督列於都統之次總兵官列於副都統之次副將列於叅領之次有事故不能行禮者亦聲明填注。

十三年奏準

車駕巡幸有民人申訴如去

御路稍遠不在官兵管轄之內者專汛官罰俸三月兼轄官罰俸一月。十六年覆準盛甲旗轟軍裝等項若遇天時陰雨雖繫點察操演日期

悉令免其穿戴披執以防潮濕損壞。二十二

年

諭外省駐防將軍及綠營之提鎮出行則皆乘輿夫將軍提鎮有總統官兵之責若養尊處優自圖安逸亦何以表率營伍而作其勇敢之氣况旗人幼習騎射即綠營中亦必以其弓馬優嫺始厯加升用乃一至大僚轉致狃於便安忘其故步此豈國家簡擢之意耶京師都統副都統既皆乘馬而滿

洲侍郎則無論年逾六旬亦皆不得乘輿即朕巡省所至尚每日乘馬而行乃外省武職獨相沿陋習此正非宜嗣後將軍提鎮槩不許乘輿其編設轎夫並著裁革如有仍行乘坐者照違例治罪可通行傳諭知之欽此○又

諭前因外省將軍提鎮有表率營伍之責出皆乘輿恐致狃於便安是以特行禁止但此內有宣力已久之年老大員又未可一槩而論嗣後如年逾七

十不能常行乘馬者令該員自行酌量奏聞請旨
餘不得假藉欽此

一錢糧原定武職各官將經手錢糧乾沒侵欺
者革職提問照例勒追如繫兵丁字識侵欺者
照例治罪勒追該管官革職○又定武職各官
將正雜錢糧擅自那移別用者革職若因緊急
軍需未經報明督撫私自那移應用者降一級
留任俟銷算清完之日開復至存留公用錢糧

因公那用者免議那移米豆草者亦照此例分別議處。康熙九年題準武職各官解送錢糧沿塗停閣日期者罰俸一年。四十二年題準運到軍營米糧豆草經收武職各官延挨不收及不收本色勒索折價者統兵將領察出題叅將經收官革職提問此等延挨勒索情弊經監放錢糧官據實申報統兵將領徇隱不題叅者亦革職提問若繫失察將統兵將領等降四級

調用經收武職之該管官革職至統兵將領等
及武職大小各官販賣米糧豆草屬託地方官
多取價直或將民間所買米糧豆草作為已物
屬託地方官令其收買者皆革職提問如將此
等情弊舉首者繫官以應升之闕先用繫常人
授為七品官。又議準武職各官有承追之銀
千兩以下者於文到日限一年追完不完罰俸
一年再限一年不完降一級留任再限一年追

完開復不完照所降之級調用若承追千兩至
五千兩者以五年為期每案每年追完二分不
及二分者初叅降俸二級二叅罰俸一年三叅
降一級四叅再降一級皆留任五年限滿追完
開復不完照所降之級調用承追五千兩以上
者以十分為率勒限五年初叅降俸二級二叅
罰俸一年三叅降一級四叅再降一級皆留任
五年限滿能完至七分者準其開復未完之銀

再行按年起限不及七分照所降之級調用至
接任官以任事之日起扣限承追如本人實屬
無力完帑承追官出結呈報由督撫題請豁免
不得株連親族倘濫行着落親族代賠將承追
官革職若豁免後本人見有產業悉行入官出
結官革職該管上司照文職例分別議處所欠
之銀着落出結官賠補該管上司有逼勒出結
之事不行出首者將出結官並逼勒之上司皆

革職。又議準武職各官有承追之銀於一年
限內追完三百兩以上之案者每案紀錄一次
千兩以上之案五年限內追完者紀錄一次接
任官以任事之日起限於一年限內追完千兩
以上之案者加一級五千兩以上之案者加二
級萬兩以上之案者加三級此等加級遇別案
承追應降調者準其抵銷若一年限內追完萬
五千兩以上之案者以應升之闕即用。乾隆

六年奏準軍營販賣米糧豆草多取價直及將民間所賣米糧豆草屬託地方官令其收買舉首之常人即授為七品官未免太優應改為給與八品頂帶

一漕運原定江南江西浙江湖廣糧多路遠運官限內抵通全完者一運加銜一等二運加銜二等三運議叙即升不復加銜至三運後仍按運數加銜山東河南糧少路近運官限內抵通

全完者一運紀錄二次二運加銜一等三運紀錄二次四運加銜一等五運紀錄二次六運議叙即升不復加銜至六運後仍按運數相間紀錄加銜其重運効力武舉繫領運江南江西浙江湖廣遠省者每運全完於補官日紀錄二次領運山東河南近省者每運全完於補官日紀錄一次三運既滿咨部注册推用。又定運官已經升任遇前任內應議叙即升者於新任內

加銜一等。又定各省漕糧江北各幫限十二
月內過淮江寧蘇州常州鎮江及廬州幫限正
月內過淮江西浙江湖北湖南限二月內過淮
山東河南限正月內全數開行其過淮各幫如
違限十日者運官細打二十仍令督運違限一
月者細打四十革職戴罪督運如現在議處之
時戶部咨到糧已全完者準免議處。又定過
淮違限革職戴罪督運之員於完糧後由總漕

題請開復。又定各省漕糧經徵衛所官未完
一分以上者罰俸六月未完二分以上住俸未
完三分以上降二級未完四分以上降三級未
完五六分以上革職皆戴罪徵收完日開復其

叅後仍違限未完者加倍議處

應罰俸者住俸
應住俸者降二

級應降二級者降四級應降三級者革職皆仍
戴罪徵收完日開復應革職者即實降三級調

用白糧考成亦照此例署印官照屯糧署印官

例議處。又定隨漕輕齎等項經徵衛所官初

叅未完不及一分停升罰俸一年未完一分降
職一級未完二分降職二級未完三分降職三
級未完四分降職四級皆戴罪徵收未完五分
以上者革職署印官照正印官例議處不及一
月者免議以上經徵未完官初叅之後再限一
年全完限內若仍不完不復作分數照原叅分
數議處不及一分者降一級留任再限一年全
完若仍不完降一級調用未完一分者限內完

至八九釐降三級留任再限一年全完若仍不完降三級調用未完二分者限內若仍不完降四級調用未完三分者限內若仍不完降五級調用未完四分以上者限內若仍不完革職○

又定各省漕糧山東河南限三月初一日抵通江北限四月初一日抵通江南限五月初一日抵通江西浙江湖北湖南限六月初一日抵通均於三月內完糧限內完糧者準其議叙若山

東河南江北完糧在三月之外江南江西浙江
湖北湖南完糧逾九月初十日者均以違限題
叅違限不及一月者罰俸三月一月以上者罰
俸六月二月以上者罰俸一年三月以上者降
一級留任內有因過淮違限已經議處者將抵
通完糧各日期扣除免其議處

過淮違限十日
將抵通完糧違

限十日扣除凡日
期多寡均照此算領運白糧官亦照此例。又

定漕船抵通運官以通幫之糧計算如有掛欠

不及一分者責二十革職發南限一年追完免
罪復職不完革職掛欠一分者責三十掛欠二
分者責四十掛欠三分者責六十皆革職各按
掛欠分數發南限一年追完免議不完交刑部
治罪掛欠四分者責八十掛欠五分者責一百
皆革職各按掛欠分數發南限一年追完仍聽
刑部議結掛欠六分以上者即交刑部治罪旗
丁管駕一船即以一船之糧計算如有掛欠各

按其分數發南限一年追完不完交刑部治罪
○又定運官掛欠漕糧發南追比者戶部倉場
咨到之日即行開缺限內全完題請開復赴部
候補○又定僉運旗丁除文生員專功舉業準
其優免外其捐納貢監及武生一例僉運如武
生遇歲考之年呈報學政於回日補考○又定
運官領運漕糧剋削旗丁或將應給錢糧侵扣
不發或將月糧修船等銀自行領出收貯抑勒

不發或因需索不遂酷責旗丁者皆革職究擬
○又定奉

旨差遣及赴任各官均有定限漕船應讓路放行其
買賣並一應行船應令照常行走如漕船立纛
監旗鼓吹張號強橫武斷運官不行察禁者罰
俸一年○又定漕船到汛不速催趲無故容令
先後越幫者專汛官罰俸九月兼轄官罰俸六
月其漕船入境日期不察明轉報者專汛官罰

俸六月若前汛催趲不力致礙次船後汛之員
申報倉場將前汛之員察叅議處至不親赴水
次催趲並坐視前船阻塞不行申報者亦照催
趲不力例議處。又定漕船出運以十年為滿
號該管守備先期請領料價成造倘有遲延致
誤冬兌冬開者革職如捏報成造或釘稀板薄
不合式者降二級調用仍將料價著落賠補至
奉委成造託故推諉並日久不告竣者皆降一

級調用。又定漕船在大江黃河洪澤湖遭風
漂沒勘實題明準與豁免運官免議其在內河
失風及水凌擦漏沉溺運官失於防範者罰俸
一年若遇汎水漲發猝不及防失事之船果能
戽救修艤抵通全完並無虧折運官免議仍照
完糧例議叙沿塗催趲之汎官亦免議處倘船
非滿號米有掛欠雖買補全完仍照例議處沿
塗催趲之汎官不能協同護救以致漂沒者照

失於防範例罰俸一年。又定漕船遭風漂沒沿塗催趲之汛官不即申報者罰俸一年不親臨確勘遽出保結者革職。康熙三年題準運官領兌漕糧抗不赴次及赴次恣意勒索淋尖倚勢損打或不約束旗丁致令爭索斛面酒席恥辱糧官或沿塗生事騷擾阻壓行船不許前進恃強毆官鬪斃民命運官縱容坐視及隨幫領押回空任意停泊兵役前往催趲抗不遵依

轉縱旗丁毆打者皆革職究擬沿塗專汛官不
察拏者降二級調用若已抵津通責成天津總
兵官通州副將稽察防範如不行察拏副將降
二級調用總兵官降一級留任如沿塗專汛官
及副將能察拏申報者槩免議處已經申報而
該管之各鎮不察叅者降一級調用。又題準
運官緣事應革職審擬其未經起程者該督撫
即行審擬別簽領運已經起程者除命盜等項

重情卽革職審擬至尋常一切罣誤竣交糧完
日押令回省審結。又題準漕船所過地方有
汛兵需索銀錢者該管官照失察衙役犯贓例
議處汛官需索者將該管上司照不揭報劣員
例議處需索之人皆計贓以枉法論如止收受
土儀禮物繫官罰俸九月兵丁筈四十若汛官
汛兵需索或旗丁行賄運官不申報者照應申
不申例議處知情故縱者照以財行求律與旗

丁一并治罪。又題準官員已簽領運若抗違規避誤漕者革職。又題準運官擅準呈辭拘繫新簽領運之人以致誤漕者照誤漕例議處。又題準運官攬載客貨及私載已貨者革職。若旗丁於應載土宜之外攬載客貨私載已貨運官失於覺察者降一級調用。又題準衛官捏告運官侵糧希圖奪運以致誤漕者革職。又議準運官並非因公羈絆以私事逗遛不親

押運至糧船抵通起卸之後始行趕至者皆革職其因公羈絆於糧船抵通起卸後始行趕到者罰俸六月至領運北上運竣南旋托故回籍者革職。二十一年題準抵通漕糧有糠粃砂土者領運官革職如無糠粃砂土收糧官抑勒不收者降二級調用。二十六年題準運官巡察不勤以致失火燒燬漕船者降一級調用該管專汛官不實力撲救以致延燒別船者罰俸

一年。二十七年題準運官需索旗丁不遂不顧風浪逼渡江湖以致漂沒糧米淹斃人口者追埋葬銀給死者之家漂沒糧米著落賠補。

二十八年題準運官縱容旗丁捉船撥淺漫無約束者照例議處。二十九年題準運官領運漕糧停泊演戲逍遙任催不理或凌辱牘官強開牘版洩水以致誤漕者革職究擬至不按程前進沿途脫幫遲誤者降二級戴罪督運若催

趲不力捏報水淺搪塞者罰俸六月。又題準
衛所官解送撥船遲誤或以朽壞之船應數者
罰俸一年。又題準運官領運白糧私行與人
者革職提問。四十六年題準各省旗丁限內
過淮抵通全完者總漕賞給花紅如抵通交糧
於額數之外有管運三年陸續多交百石者倉
場咨部注册管運六年於額數之外陸續多交
二百石以及管運二十年雖交糧無多而並無

掛欠事故者均由倉場覈實咨部給以九品頂帶榮身。又議準給有頂帶之旗丁及管運之捐納貢監生武生有干犯漕規者與旗丁一例懲治。又議準運官除犯贓失守軍政糾叅及隱匿逃人之罪者不準以完糧議叙抵銷其因公呈誤應降級調用者準以見在議叙之加銜一等抵銷降一級已加之銜不準抵銷議叙紀錄者亦準抵罰俸若罪至革職者不準抵銷。

五十年議準漕糧未經兌完捏報兌完漕船未經開行捏報啟行者皆降二級調用。五十一年題準衛所官收兌漕糧多攙糠粃砂土及將漕糧私自折者皆革職。又議準旗丁須僉家道殷實之人由該管千總察實出具保結呈報守備等官覆驗加結如有掛欠將濫行出結之千總守備皆降一級調用。又題準運官抵通無欠倉場給發限單令其即回協同隨幫管

押漕船到淮呈驗限單如到淮違限者照規避
例革職。雍正二年覆準衛所漕船開行過十
二月者罰俸半年過正月者罰俸一年過二月
者降二級留任其湖南漕糧限十一月運至岳
倉如州縣漕糧旗丁漕船均到水次運官收兌
遲延致過十二月者照過二月開行例議處如
能依限過淮題請開復。三年議準漕船夾帶
私鹽者運官降三級調用隨幫褫革如倚恃漕

船任意販載不服盤察者運官革職隨幫責四十褫革若於該管幫船一年之內並無私鹽者紀錄一次隨幫於補官日紀錄一次至回空三次並無私鹽者該管官將隨幫出具印結咨部以千總推用。四年議準漕船私帶礮者失察之該管官降一級調用失察私帶鳥槍者罰俸一年。又題準領運漕船若遇風色不順水勢浩大該專汛官與運官公同計議暫停守候即

將守候日時申報上司及總漕於入境出境冊
內注明倘不顧風色水勢催趲前進在內河致
有疎虞者運官與專汎官皆罰俸一年如捏稱
風水未便停泊逗遛者運官與專汎官皆降二
級調用。又議漕糧潮濕霉變致有虧折者
運官革職限一年賠補完日送部引

見請

旨開復不完究追其居官優者督撫保題留任亦限

一年賠補完日開復不完革任究追。又議準
出運旗丁犯罪責令該幫運官拏解有司究治
如疎縱脫逃及遲延不解者按旗丁所犯輕重
照例分別議處。又議準旗丁攬和水米運官
不能察出者革職如隱匿不報革職枷示俟旗
丁將糧米賠完日釋放。十年議準漕船夾帶
硝黃者運官照夾帶私鹽例議處。十三年議
準漕船出運遇有風火事故應賠造而擅行雇

募者降一級調用應賠造而擅行買補及應買補而擅行雇募者皆罰俸九月。又議準旗丁盜賣漕糧領運官不能察出降一級調用其沿塗稽察之專汛千把總失察盜賣米數不及五十石者一起罰俸六月二起罰俸一年三起降一級留任四五起以上者降一級調用其有失察一二起合算米數至五十石以上者降一級留任一起以至三起合算米數至百石以上者

降一級調用兼轄游守失察盜賣米數不及五十石者一起罰俸三月二起罰俸六月三起罰俸一年四五起以上者降一級留任其有失察一二起合算米數至五十石以上者罰俸一年一起以至三起合算米數至百石以上者降一級留任專汛兵丁失察盜賣者每起杖八十。乾隆五年議準運官領運薊糧抵薊全完照山東河南近省例議叙。又議準運官中途遇有

降革病故等事該上司委令隨幫代押限內抵
通完糧者如在天津以南咨部歸於代押重運
班內推用如在北河委令代押者補官日紀錄
一次。又議準運官在塗患病不能押運詳報
所在地方印官會同前後幫運官驗實出具並
無假捏印結請委隨幫代押俟抵通完糧後將
隨幫分別議叙。又議準湖廣漕船過淮以後
失事賠造不及者將該船暫減一年限一年修

造免以督造不力議處其未經過淮以前失事者仍按限賠造。七年議準領運薊糧有攬和薊州白土者照攬和水米例議處。又議準江南江西浙江湖廣遠省運官遇截留漕糧如數通完離水次五百里以外者紀錄一次千里以外者紀錄二次二千里以外者照抵通全完例加銜一等山東河南及不過淮之各幫遇截留漕糧如數通完離水次五百里以外者紀錄一

次千里以外者照近省抵通例議叙至委領重
運効力武舉及中途代押之隨幫武舉管押江
南江西浙江湖廣遠省截留漕糧如數通完離
水次五百里以外者補官日紀錄一次千里以
外者補官日紀錄二次山東河南及不過淮之
各幫截留漕糧如數通完離水次五百里以外
者重運武舉準作一運隨幫武舉準作押空一
次千里以外者補官日紀錄一次。又議準漕

船隱匿逃人將不行察拏之運官降二級調用
隨幫武舉於補官日降二級調用若回空漕船
隱匿逃人該運官尚在交糧未經上船者免議
○八年奏準旗丁不親管運將倉運之衛守備
罰俸一年運官不能察出降一級留任。又議
準戴罪督運之員如於總漕題叅未經議結以
前能以完糧報部者準免議處其已經題結者
照過淮違限例總漕於完糧後題請開復。九

年議準松江江西湖南漕船過淮準於正限外
展限十日。十四年議準漕船丁舵水手應需
食鹽每船不得過二十斤有逾數夾帶者運官
照例議處專汛官罰俸六月。又題準漕船回
次責成隨幫武舉約束防範遇有風火等事將
職名察叅如有新運千總接管即將新運千總
察叅其減存在次漕船千總隨幫不能兼顧者
責成該管地方官約束防範。十五年題準溫

州衛屯租徵收濟運有限內不完者照雜項錢糧例議處。十七年

諭前因江西鉛山等幫沿塗使用陋規一案已降旨交該督撫河漕提鎮逐一叅劾治罪今漕運總督來京朕命將南漕舊規分別應裁應給各款數目與軍機大臣等會議將各省漕船陋例分別裁革立定章程通行曉諭遵守夫因事餽遺借端勒索均干禁令况漕糧事關天庾豈容不肖弁役恣行

婪賄但據該總漕酌定規例章程之內即有必不
可盡革之處則從前弁役雖借此侵漁而按其情
罪究繫相沿陋規與營私納賄者有間所有從前
令各該督撫河漕提鎮叅劾治罪之處著加恩寬
免朕辦理諸務輕重自有權衡裁制全無成見既
經察出弊竇自應禁革而經營承辦必不可已之
費亦當酌定條款俾知法守嗣後各該管上司官
不時嚴行稽察如有不肖弁役或將已裁陋規私

自婪收或於定數之外多行勒索即據實嚴叅將與者受者一并治罪該管官不行揭報及上司徇隱不即叅劾別經發覺定將失察之督撫提鎮等從重治罪欽此。又奏準南漕舊規既經酌給有條裁革有禁運官旗丁倘或有婪收勒索諸弊皆干嚴譴惟是向來頭幫旗丁為諸弊叢生之根則責成頭幫旗丁是亦剔弊清源之法嗣後頭幫旗丁復行科斂將已裁陋規私自婪收或

於定數之外多行勒索者令各幫旗丁於該管衙門呈控審究確實計贓分別首從定擬若運官及營汛官受賄令該管上司即行叅革治罪若兵丁受賄運官及營汛官或故縱或失察亦分別題叅交部議處至旗丁挾嫌捏控者照誣告律分別加等治罪。又奏準旗丁盜賣漕糧將運官捆責四十數至五十石以上者降一級百石降二級皆調用二百石者革職。十八年

議津武職加銜既經刪除嗣後運官領運遠省者一運全完加一級二運全完加二級三運即升近省一運全完紀錄二次二運全完加一級三運五運與初運同四運與二運同六運即升所加之級準其隨帶

一屯田順治初年定衛所官將應行起解錢糧於奏銷以前如數全完千兩以下者紀錄一次千兩以上三千兩以下者紀錄二次三千兩以

上者紀錄三次徵糧一石者作銀一兩計算考
成其署事官於奏銷前全完者照此議叙若止
完地丁錢糧而本色顏料並一應雜項未完者
不準議叙。又定衛所官將經手錢糧朦溷銷
算者降二級調用應行完結錢糧故留疑竇並
不分晰溷行造冊呈報以致款項不符者降一
級調用冊內數目舛錯遺漏者罰俸一年若將
冊結遲延不送經督撫題叅或限內並違限不

及一月者罰俸三月違限一月者罰俸六月二
月者罰俸九月三月者罰俸一年四五月者降
一級留任六月以上者降二級調用一年以上
者革職至造尋常一應冊籍不關繫錢糧者若
有舛錯遺漏罰俸三月如有遲延仍按月議處
○又定衛所官勸民開墾荒地五十頃以上者
紀錄一次百頃以上者加一級百五十頃以上
者加一級紀錄一次二百頃以上者加二級統

歲水田六年旱田十年起科時該督撫取具印
結題請議叙。又定衛所官捏報開墾者革職
開墾後復荒者將開墾議叙之加級紀錄銷去
其開墾荒地不照水田六年旱田十年起科之
例或先期科徵或遇期不徵或擅減地畝定額
錢糧者革職或不照起科定限豫詳請徵或將
開墾地畝以多報少以少報多或將已報開墾
之地重複開墾或將荒熟地畝不明白分晰或

將應徵錢糧不行察出者皆降一級調用至丈量地畝互相推委遲延日期或將丈量地畝詳報不清及不送文冊檄催並不申詳者皆罰俸一年。又定衛所開墾地畝錢糧徵收全完取具印結隨同奏銷題報若有遲誤照違限例議處。又定衛所被災田畝該管官隨時詳報夏災不逾六月秋災不逾九月如報災遲延半月以內者罰俸六月一月以內罰俸一年一月以

外降一級調用二月以外降二級調用三月以外者革職其被災分數於題報情形之後衛所官限四十日內察明造冊詳報如不依限詳報亦照報災逾限例議處至妄報被災及有災不報者皆罰俸一年報災之時不送印結及冊內不分晰詳明或止報巡撫不報總督者皆罰俸六月。又定衛所田畝被災奉蠲錢糧衛所官或濶徵侵蝕或不即通行曉諭希冀暗吞或捏

稱有蠲有不蠲私圖自得一半或將賑濟災戶銀米及所免錢糧借名肥己者皆革職提問若將奉蠲錢糧增減造入冊內者降二級調用或被災尚未題請蠲免於報冊內填入蠲免者罰俸一年。又定衛所官經徵河銀一年全完三百兩以上者紀錄一次。十八年題準經徵屯糧初叅未完不及一分者停升未完一分罰俸六月未完二分罰俸一年未完三分降俸一級

未完四分降俸二級未完五分降職一級未完
六分降職二級未完七分降職三級未完八分
降職四級皆戴罪徵收完日開復未完九分十
分者皆革職署印官未完一分二分者罰俸三
月未完三分四分罰俸六月未完五分六分罰
俸九月未完七分八分罰俸一年未完九分十
分降一級調用署印不及一月者免議以上經
徵未完官初叅之後再限一年全完限內若仍

不完不復作分數照原叅分數議處七分八分
限內若仍不完革職六分五分限內若仍不完
降五級調用四分三分限內若仍不完降四級
調用二分以上限內若仍不完降三級調用一
分以上限內完至八九釐者降三級留任再限
一年全完不完降三級調用限滿未完不及一
分者停升罰俸一年。又題準衛所官經徵鹽
課未完不及一分者停升未完一分以上降俸

一級未完二分三分降職一級未完四分五分
降職三級未完六分七分降職四級皆戴罪徵
收完日開復未完八分以上者革職署印官未
完一分二分者罰俸三月三分四分罰俸六月
五分六分罰俸九月七分八分罰俸一年九分
十分降一級調用署印不及一月者免議以上
經徵未完官初叅之後再限一年全完限內若
仍不完不復作分數照原叅分數議處不及一

分者限內若仍不完降一級留任再限一年全
完不完降一級調用一分二分限內若仍不完
降三級調用三分四分限內若仍不完降四級
調用五分六分限內若仍不完降五級調用七
分以上者限內若仍不完革職。又題準衛所
官承銷鹽引未完一分者停升未完二分降俸
一級未完三分降俸二級未完四分降職一級
未完五分降職二級未完六分降職三級未完

七分降職四級皆戴罪督銷未完八分以上者
革職其戴罪督銷官限一年銷完如限內不完
照屯糧限滿未完例議處至行鹽地方衛所官
如有私勒戶口買鹽銷引者革職不行察報之
上司各降三級調用署印官銷引未完一分二
分者罰俸三月未完三分四分罰俸六月未完
五分六分罰俸九月未完七分八分罰俸一年
未完九分十分降一級調用署印不及一月者

免議。又題準衛所行鹽地方如將鹽引不行
題明私自那撥者該管官降一級調用其前官
已銷鹽引不行送部及將鹽引題報遲延或題
報鹽引前後不符者該管官罰俸一年。康熙
十四年議準衛所官有限滿未完錢糧初叅四
分繫

赦前二分

赦後二分者若限內將

赦前未完二分已經全完止照

赦後未完二分議處如限內

赦前二分未完仍合

赦前

赦後一并議處至初叅四分皆在

赦前限內未經全完仍照原叅分數以初叅例議處

如限滿未完錢糧限內又經遇

赦者扣除

赦前月日以

赦後計算年限滿日察明題叅照例議處。又議準
衛所官經徵各項錢糧於未完之先別經降調
離任者罰俸一年。又議準衛所官有未完雜
項錢糧不作分數者由部覈明題叅降俸二級
戴罪督催完日開復限內不完罰俸一年仍令
督催署印官有未完不作分數雜項錢糧者罰
俸一年。又議準衛所官以未完錢糧捏作全

完申報或限內經一二官徵完捏作一官徵完者皆革職如衛所官申報未完該管上司以全完轉報者將上司議處衛所官免議至錢糧未經起解申報起解或庫內無銀申報有銀者皆降二級調用一應批廻未獲稱為已獲未發稱為已發者皆罰俸一年。十五年議準衛所及武職各官有隱匿熟地及新墾地一畝至九畝降四級調用十畝以上革職一項以上革職杖

一百折贖永不叙用武進士武舉武生隱匿一畝至九畝黜革十畝以上黜革杖一百折贖一頃以上黜革杖一百折贖永不叙用隱匿地畝入官錢糧按年追徵至各官失察隱匿熟地及新墾地至五十畝者降一級調用一頃降二級調用一頃五十畝降三級調用二頃降四級調用二頃以上者革職如先因清釐隱匿及開墾荒蕪有加級紀錄者均準抵銷此內有升遷降

調休致告病已經離任者經接任官察出皆照見任官議處已經革職者如實繫欺隱仍行治罪繫失察者免議。二十七年奉

旨出首開墾地畝不必拘定年限均自出首之年徵收錢糧該管官免其議處。三十四年議準凡有分數錢糧接徵衛所官以到任之日限一年全完如限內不完將已完分數扣除照見在未完分數以初叅例議處。又議準徐淮臨德等倉本色

米及改折銀限一年全完不完將衛所官照屯糧初叅例議處如再不完照屯糧限滿不完例議處。雍正五年議準衛所官有經理民事者其旗丁屯軍居住州縣地方有犯命盜等案該管州縣移會衛所嚴行緝拏限滿不獲將衛所官同州縣一并題叅議處如衛所官因州縣既有責成徇庇旗丁屯軍或故意推諉者許承審官揭報督撫題叅照徇庇例議處其不經理民

事專管漕運者旗丁屯軍犯命盜等案疎防承緝止將州縣官叅處衛所官免其并叅。乾隆二年議準衛所地方被災若距省窩遠詳報被災情形分數均扣算程塗日期如詳報到省在限外而扣算程塗日期尚未逾限者免其揭叅扣算已至逾限者各按遲延月日議處。三年議準貴州苗疆屯軍人等將官給屯田私自典賣與人該衛千總不行察出者罰俸一年至越

界侵占苗人土田山場並砍伐竹木該衛千總失於覺察者降一級留任徇情隱匿不報者降三級調用。又議準衛所官經徵蘆課未完或初叅或限滿題叅皆照徐淮等倉例議處。又議準衛所官凡有未完各項錢糧經戶工二部覈明續完蠲免具題到部者不竢題覆即準銷案如戶工二部疏內分數職名與本部原案不符咨詢戶工二部銷案如又有不符仍行題明

察辦。又議準衛所經徵接徵各官有未完錢糧叅後續完或

恩赦蠲免應行開復本官不呈請開復者罰俸一年。又議準衛所倉廩該管官於滲漏處不行修補及應蓋造倉廩不詳請蓋造以致米穀霉爛者革職動帑代買勒限一年照數追賠限內不完照損壞倉庫財物律治罪如侵盜入已捏稱霉爛虧欠者照侵蝕例治罪

一限期順治初年定武職各官赴任違限一月以上者罰俸三月二月上罰俸六月三月以上降一級調用四月以上降二級調用五月以上降三級調用半年以上革職不及一月者免議。康熙十一年題準凡

欽部事件督撫提鎮皆以文到日為始限四月具題
兼管二省之總督所管隔省事件限六月具題
福建之臺灣廣東之瓊州湖南廣西雲南貴州

之苗疆陝西之安西四川之寧遠府所屬州縣
各該督撫於正限之外分別展限該省提鎮亦
照巡撫例展限江南湖廣提督管兩省者照總
督例展限至違限月日皆專責督撫提鎮計月
議處不分坐屬官若違限不及一月者免議違
限一月罰俸三月二月罰俸六月三月罰俸九
月四五月者罰俸一年半以上降一級留任
一年以上降二級留任二年以上降三級調用

倘事屬繁重限內難結者承察承辦官將情由
申詳該督撫提鎮題明展限如將易結之事遲
延不結或將難結情由不申詳督撫提鎮將屬
官題叅或限內並違限不及一月者將承察承
辦官罰俸三月若事已完結將屬官以遲延題
叅違限不及一月者督撫提鎮免議屬官亦免
議若違限一月承察承辦官罰俸一年督撫提
鎮仍計月處分。又題準提鎮新任及接署者

皆以受事之日扣限若科場監試按日扣算展限不必具疏題請其因公務在本省內經行者不準展限。又議準副叅以下各官推補得闕之後無故不赴兵科畫憑違限一月以上者罰俸一年兩月以上者革職如兩月以上無故不赴部領劄者亦革職。又議準武職裁汰復職降調初授等官自原任處所及原籍地方起文赴部投遞在京者限十五日直隸限兩月山東

山西河南限三月江南江西浙江湖廣陝西限
四月福建四川廣東廣西貴州限五月雲南限
六月如有違限者照赴任違限例議處。又議
準營衛升任各官於劄付限票到日該督撫提
鎮委官署理限兩月交代明白離任如升任官
有經管未完錢糧盜案事件署任官或新任官
不於兩月內覈明呈報上司或升任官遲延不
交及署任新任官推委不接者各罰俸一年上

司督催不力罰俸六月若已申報上司該管上司不即轉報或於升任官劄票已到不即委官署理者各罰俸六月該管上司已經轉報督撫提鎮具題遲延者亦罰俸六月無未完錢糧盜案上司借端勒索稽留者將該上司降二級調用督撫提鎮降一級留任署任新任官如有勒索稽留亦照此例議處其升任官不候劄票即行離任或不與署任新任官交代明白即赴新

任者將升任官降二級調用至錢糧盜案未經
清楚署任新任官即聽升任官徑赴新任者將
署任新任官降一級調用督撫提鎮罰俸一年
升任官有錢糧冊籍未清捏稱完結或假捏印
結申詳上司或增改投遞者革職升任官將冊
籍等項於未交代之前或被兵丁字識燒燬棄
擲藏匿者降一級調用兵丁字識有乘機作弊
侵匿銀錢者照失察衙役犯贓例議處其解任

裁汰降調各官不候交代擅自離任及署任新任官並督撫提鎮聽其離任者亦照此例議處。二十二年題準兵馬錢糧冊結所關緊要造報皆有定限必須詳慎覈對明白若朦朧造報故留疑竇以致款項不符者降一級調用轉報官罰俸一年提鎮罰俸六月繫提鎮覈叅者將造報轉報官議處若冊內數目或有舛錯遺漏者造報官罰俸一年轉報官及提鎮各罰俸六

月如冊繫提鎮自造有舛錯遺漏者亦罰俸六
月至造報轉報官將冊籍遲延不送經提鎮題
叅或限內並違限不及一月者罰俸三月違限
一月者罰俸六月二月者罰俸九月三月者罰
俸一年四五月者降一級留任六月以上者降
二級調用一年以上者革職若冊結已經申送
而提鎮不即題咨違限五月以下者照造報官
例議處六月以上者降二級留任一年以上者

降三級調用至造尋常一應冊籍不關繫錢糧
者若有舛錯遺漏罰俸三月轉報官罰俸一月
如有遲延仍按月分議處。二十三年議準武
職衙門前官有侵欺那移拖欠未清之項接任
之署任官新任官於交代限期内徇隱不報至
交代後始行察出者不議前官竟坐接任官名
下照例議處如有侵那拖欠等弊接任官不受
交代通詳督撫提鎮及該上司而督撫提鎮及

上司不揭報題叅徇庇前官逼勒接任官交代者接任官即據實報部將逼勒各官以徇庇例議處接任官調補別省。三十二年覆準福建之臺灣澎湖升任官均令新舊交代其直隸山東山西河南江西湖北湖南西安甘肅等省升任官劄票到日照部定限期速赴新任所有營務委官署理不必新舊交代江南福建浙江四川廣東廣西雲南貴州等省升任官如有人堪

以委署該督撫提鎮即行委署不必留候交代
如無可委署之人仍留候新舊交代將留候交
代違限緣由報部如無故違限照赴任違限例
議處。四十五年覆準提鎮有奉

旨調取來京者行文該督撫計程定限給咨赴部投
遞聽候引

見仍將起程日期豫行報部引

見後回任日期亦行報部。雍正九年議準督撫提

鎮覈叅武職交代遲延案件將遲延情由詳細
確察如舊任希圖掩飾不於兩月內將任內錢
糧等項造冊交送經督撫提鎮指叅將舊任官
罰俸一年接任官免議舊任官遲至例限將屆
始將冊籍造送接任官又不上緊察覈以致遲
延者舊任官罰俸一年接任官罰俸六月舊任
官已明白造冊交送而接任官推諉不接以致
遲延者接任官罰俸一年舊任官免議其督催

不力之上司仍照例罰俸六月。十二年議準在京鑾儀衛漢鑾儀使及巡捕營各官領俸清冊春季於上年十二月十五日以前秋季於六月十五日以前依限造送到部移咨戶部關支其有降罰事故者由部於奉

旨後注冊並知會戶部備案領俸之時該衙門將各官有無事故造冊送部由外任升調者若有隨帶降罰之案該員具呈該衙門即於冊內注明

均交稽俸廳將各官降罰並見在照何品級食俸之處覈對確實一并移送戶部倘造冊遺漏舛錯照例議處。十三年議準武職各官赴任如有中塗旅店舟次患病難行及風水阻滯違限止一二月者該員呈報該省督撫提鎮咨報部科免其叅處若違限至三月以上果有阻滯實情取具該地方官印結申送部科免議如無地方官印結及並無事故借端觀望遲延不赴

新任並繞道歸里捏稱中途患病者皆按違限
月日議處。乾隆元年奉

旨朕因各省提督總兵官未經識認者甚多是以降
旨令其酌量先後來京陛見向來提鎮到京皆赴
部投文聽候引見但此例不行已久督撫提鎮同
為封疆大吏督撫既不赴部引見則提鎮到京亦
準其即赴宮門請安候朕宣召不必先行赴部至
起程赴京及回任日期仍循舊例報部以便稽察

○三年議準凡通行督撫提鎮按本地情形詳細察議事件各該督撫於四月六月正限之外若事易結者展限兩月難結者展限四月該督撫分別題咨按限完結各省提鎮有總督統轄者凡通行察議事件由總督彙覆該提鎮毋庸別定期限其無總督統轄之提鎮遇通行察議事件照該省巡撫易結難結之例分別題咨按限完結如逾限不結皆照

欽部事件遲延例分別議處。六年奏準在京革職官曾經問有罪名者限一月起程回籍五城司坊官將起程日期報部並知會原籍倘不即起程違限一月以上者本人照例治罪巡捕營專汛官不於限內催令起程容留一人者降一級留任二人者降一級調用三人者降二級調用四人者降三級調用五人者降四級調用六人以上者革職兼轄官容留一二人者罰俸一年

三四人者降一級留任五人以上者降二級調用十人以上者降四級調用步軍統領於所屬巡捕營地方容留一二人者罰俸三月三四人者罰俸六月五人以上者罰俸一年十人以上者降一級留任。又奏準外任革職官交代完日即行起程不得過五月之限該督撫提鎮等將起程日期報部並知會原籍倘不即起程違限一月以上者本人照例治罪專汎官不於限

內催令起程容留一人者降一級留任二人者降一級調用三人者降二級調用四人者降三級調用五人者降四級調用六人以上者革職
兼轄官容留一二人者罰俸一年三四人者降一級留任五人以上者降二級調用十人以上者降四級調用提鎮所屬地方容留一二人者罰俸三月三四人者罰俸六月五人以上者罰俸一年十人以上者降一級留任其有冤抑欲

赴都察院具呈申理者地方官給咨來京事竣
發回原籍如借端留滯者照例治罪徇情容留
之五城司坊官交吏部議處。又奏準漢侍衛
及鑾儀衛行走之漢世爵等官請假回籍者呈
該管官酌定日期具奏請

旨其往返程塗在京者限十五日直隸限兩月山東
山西河南限三月江南江西浙江湖廣陝西限
四月福建四川廣東廣西貴州限五月雲南限

六月除往返日期外在家均許住四月依期回京如違限一年以上者罰俸一年二年以上者休致。十一年奏準各省督撫提鎮奉到部文務令按限完結題覆咨覆之日將準咨月日及有無遲逾隨案聲明以便察覈若遺漏不聲明者照例議處。十四年奏準豫行保舉及調取

引

見官回任由部給與驗票向未定有限期此等官均

有見任職守如或逗遛日久職任久懸於營伍
地方不免遺誤嗣後豫保送部以及奉

旨調取引

見仍回原任各官發給驗票照赴任限期填注令依
限回任將驗票申繳督撫提鎮察覈將有無違
限之處聲明報部如有違逾照赴任違限例議
處至簡發各省補用者亦照此例辦理。十五
年覆準

欽部事件承察承辦官逾限不及一月完結者比照
逾限不及一月罰俸三月之例酌減罰俸一月
○又覆準辦理邊疆海疆苗疆省分事務提鎮
與督撫相同所有限期應展不應展之處照各
督撫見定州縣按照營汛坐落之地分晰聲明
至加展限期地方不準再扣道里日期。又議
準各省提鎮有通行察議事件繫專行一營者
限四月完結繫通行各營易結者限六月完結

難結者加展兩月完結至通行察議之事有不
需各營議詳在本標將領可以覈定聲覆者限
兩月完結如逾限不結察照違限日期議處至
新任接署以及巡察營汛均照例加展。又奏
準營汛各官遇有承緝承修承造等項事件均
於初叅限滿之日接扣二叅限期不得以接到
部覆之日始行起限。又奏準承緝各項人犯
營汛各官原有協同地方文職察緝之例應照

文職盜案限四月無名兇犯限六月叛逆人犯
將原定三年之限減去一年限以二年如限滿
不獲各照原例議處。又奏準候選候補武職
各官赴部投文違限向照赴任違限例議但赴
任者皆繫已經得官之人恐其逗遛規避貽誤
地方是以定例綦嚴至候補候選原與已經得
官者不同當領咨之後或因資斧艱難或因選
期尚遠或因患病難行若槩照赴任例議處殊

覺過重嗣後投文違限無故遲延違限在半年以上者得官日罰俸六月一年以上者得官日罰俸一年如果有患病及風水阻滯等情取具該地方官印結送部免其察議

一緝解康熙三年題準監犯踰城及由水門逃走者城守官罰俸三月已開城門逃走責在有獄官城守官免議。又議準營汛各官將應解犯人遲延不解者罰俸一年。十一年題準監

犯將已閉城門之鎖扭壞逃走者城守官革職
當時全獲者免議獲一半者降一級留任。雍
正三年議準押解斬絞重犯該管官僉差不慎
未經如數撥兵加鎖致脫逃者降一級調用已
經如數撥兵加鎖脫逃者降一級限一年緝拏
全獲開復不獲照所降之級調用押解流徒等
犯未經如數撥兵加鎖致脫逃者罰俸一年已
經如數撥兵加鎖脫逃者罰俸六月。七年議

準府州縣監有重犯該管專汛官撥兵協同文職巡防如監有大盜過十人以上者加兵巡防其府州縣內有提鎮副叅等駐劄者輪委千把總稽察倘監犯越獄文職會同該千把各差兵役追捕不獲照盜案專汛官例議處。又議準軍犯到配所免其墩鎖該管衛所官曲為防範不使至於饑寒如在配所本犯單身脫逃初叅將該管官罰俸六月兼轄官罰俸三月限一年

緝拏限滿不獲該管官罰俸一年
兼轄官罰俸
六月攜帶妻子脫逃者初叅將該管官罰俸一年
兼轄官罰俸六月限一年緝拏限滿不獲該管官降一級留任
緝獲之日準其開復
兼轄官罰俸一年
若在中塗脫逃者貪差不慎之營員住俸勒限一年
督緝限滿不獲罰俸一年
軍犯照案緝拏。又議準斬絞重犯越獄鄰境營汛官於一月內拏獲者每名加一級再紀錄一次

一月外拏獲者每名加一級鄰境兵丁拏獲越獄之犯繫斬絞者每名賞銀二十兩軍流以下每名賞銀十兩於原疎防官名下追給。八年議準押解人犯經由之處該營汛官撥兵護送時照牌票點明犯人及撥兵數目相符再行起解如兵數闕少或有代解等弊即詳報上司覈叅將僉差之官按罪犯輕重照僉差不慎例分別議處如隱匿不報別經發覺亦照僉差不慎

例分別議處。十三年議準武職拏獲鄰境逃犯如繫軍流之罪單身逃脫者每一名紀錄一次攜帶妻子脫逃全獲者每一起紀錄一次徒罪二名紀錄一次準其前後接算

一救火康熙九年議準

京城巡捕營地方有姦細兇徒放火不能察拏之專汛官降四級調用兼轄官降二級調用。又議準武職各官所管地方失火延燒文卷倉廩

者專汎官罰俸一年如將錢糧文卷擅藏私家以致焚燬者將該員降一級調用。二十六年

議準

京城巡捕營地方失火延燒民房十間以下即能撲滅者免議如不能撲滅延燒十一間至三十間者千把總守備罰俸九月游擊叅將罰俸六月三十間以上者千把總守備罰俸一年游擊叅將罰俸九月二百間以上者千把總守備降

一級調用游擊叅將降一級留任四百間以上者千把總守備降二級調用游擊叅將降一級調用六百間以上者千把總守備降三級調用游擊叅將降二級調用。乾隆十年覆準直省地方失火延燒民房如繫城內將在城駐劄之專汛官兼轄官照巡捕營例按間數分別議處至城外村莊失火延燒民房有該管官在於該處駐劄者亦照巡捕營例按間數分別議處若

駐劄與失火地方相隔撲救不及延燒民房十間以上即能撲滅者免議十一間至百間者專汎官罰俸九月兼轄官罰俸六月百間以上者專汎官罰俸一年兼轄官罰俸九月五百間以上者專汎官降一級調用兼轄官降一級留任一捕蝗乾隆六年奏準衛所地方蝗蝻生發該管官不即申報上司者革職不親身實力撲滅藉口鄰境飛來希圖卸罪者革職提問至衛所

及營員奉上司差委協捕並不實力撲滅以致養成羽翼為害禾稼者革職。又奏準蝗蝻生發之處能統率兵夫立時撲滅淨盡者將該員紀錄一次。十八年

諭蝗蝻為害甚大朕屢勅督撫大員躬親督率搜捕是以提鎮亦有協同往撲者然若攜帶多人需索供應則農民轉受滋擾捕蝗之害更甚於蝗此尤其大不可者著通行傳諭知之欽此

一河工原定武職修築黃河隄岸保固一年運
河隄岸保固三年如黃河隄岸於半年內衝決
運河隄岸於一年內衝決者將承修官革職黃
河隄岸過半年衝決運河隄岸過一年衝決者
將承修官降三級調用如過年限衝決者將該
汛管河官革職戴罪修築工完開復其有將督
修之兼轄官并叅者照文職河道例議處。又
定隄岸衝決限十日內具報如過十日具報者

降一級調用沿河隄岸不豫先修築以致漕船阻滯者降一級調用。又定隄岸衝決以少報多者降三級調用轉報官降二級調用若於年限內將所修隄岸衝決隱匿不報指他處呈報衝決者革職轉報官降五級調用。又定武官修築隄岸工程均限半年完工如限內不完承修官罰俸一年督修官罰俸六月再限三月完工如再不完承修官降一級調用督修官罰俸

一年。又定武職修築隄岸有一處夯杵不堅
盛水即漏並有一二丈不豐滿合式者降一級
調用兩處夯杵不堅盛水即漏並有三四丈不
豐滿合式者降二級調用三處夯杵不堅盛水
即漏並有五丈以上不豐滿合式者革職督修
官察其所屬有一人議處者罰俸一年二人議
處者降一級調用三人議處者降二級調用四
人以上議處者革職如有議處議叙相同者準

其抵算若督修官察出揭叅者免議。又定衛所官委辦河工私自潛回以致衛夫星散者革職戴罪督催工完日開復。又定隄岸衝決有例應革職戴罪賠修者限六月完工督修官降四級留任均俟工完開復如限內不完賠修官革職督修官降四級調用未完工程仍令賠修。○雍正三年議準山東河南江南各河營每兵每年栽柳百株栽不足數者專管千把總罰俸

一年守備罰俸六月裁不及半者專管千把總
降一級留任仍令補裁守備罰俸一年至各官
捐栽柳秧成活五千株者紀錄一次萬株者紀
錄二次萬五千株者紀錄三次二萬株者加一
級種葦一頃者紀錄一次二頃者紀錄二次三
頃者紀錄三次四頃者加一級。四年議準武
職修築隄岸工段丈尺椿埽料物等項有估計
過多存心浮冒者將該員革職承察官扶同徇

隱者照徇庇例議處。十二年奏準運河隄岸
專汛官督率兵丁照本汛應取土方數目堆積
備用不如數者罰俸一年不及一半者降一級
留任戴罪堆積完日開復。乾隆三年議準河
營官弁於沿河官地內捐栽小楊樹五百株者
紀錄一次千株者紀錄二次千五百株者紀錄
三次二千株者加一級如所栽不及議叙之數
準於次年補栽合算議叙其樹交該管之汛官

照管培養倘有枯損偷盜在百株以內者責令賠補至百株以上者降一級留任賠補完日開復若將民地指為官地強占栽植希圖議敘者照強占官民山場河泊律治罪○九年議準河工採買葦柴武職各官於每年定額之外多採買五萬束者該督計功獎賞至十萬束者紀錄一次再有多者照數遞加紀錄

一隨任親屬順治年間定八旗外任武職各官將任內所生之子隱瞞不報本旗入冊者照旗人隱瞞壯丁例議處。康熙二十九年奏準八旗外任武職各官因降革休致事故歸旗任內並無未清之事者離任之後該督撫提鎮即令接任官將該員家口察明造冊出具並無遺漏隱匿印結一并咨報部旗於五月內催令起程照程塗遠近定限有驛大

路日行一站無驛僻路日行五十里按日計算扣定到京日期其有水路省分願由水路行者豫先呈報仍照原定限期計算到京均咨報部旗察覈如無故不即起程逾限一月以上或中途逗遛或潛居別處或本身進京而家口仍住別處有職者革職交刑部治罪已革職者交刑部從重治罪若於原任地方起程逾限不及一月或實因患病及有別項

情由不能起程或中塗實因患病及有別項
情由不能前進者取具地方官印結報部免
議至接任官將前任旗員家口聽其隱匿不造
入冊內並該員已經起程不將日期申報或已
經申報而督撫提鎮不咨報部旗以致逗遛生
事及中塗妄借事端勒取印結地方官不據實
申報遽給與印結者發覺皆照例議處。又奏
準外任武職例應歸旗者專管官不速催起程

容留一人者降一級留任二人降一級調用三人降二級調用四人降三級調用五人降四級調用六人以上革職兼轄官於所轄地方容留一二人者罰俸一年三四人降一級留任五人以上降二級調用十人以上降四級調用提鎮所轄地方容留一二人者罰俸三月三人罰俸六月五人以上罰俸一年十人以上降一級留任。雍正五年奏準八旗外任武職各官所有

族人及十八歲以上之親子弟皆不準帶往任所如子弟有實不能相離者呈明該都統將情由具奏請

旨其未至十八歲子弟欲帶往任所者呈明該佐領叅領都統存案準其帶往至十八歲時該旗行文該督撫提鎮勒限歸旗倘私自帶往任所及隱瞞年歲將該員降一級調用。八年議準八旗外任武職各官於到任三月內將所帶家人姓

名籍貫冊報督撫提鎮如管事家人有更換者亦隨時冊報倘本官有虧空等弊將管事家人一并審究若冊報不實或聽其贖身為民將該員照隱匿逃人例議處不詳察之該管上司照失察逃人例議處得財者並計贓以枉法從重論。乾隆三年奉

旨嗣後旗員請留子弟隨任者該部務須察明實有不能相離情由方可奏聞請旨。四年奏準八旗

外任武職各官其隨任子弟因赴選應試等事
來京由任所該父兄造具本人履歷年貌清冊
呈報該管督撫提鎮移咨部旗仍具文交本人
親投該旗察對若任所該父兄繫提鎮大員可
自出咨者即自行出咨其不候給咨私自來京
或領咨潛往他處有職銜人革去職銜閒散人
鞭一百如該父兄不為請咨給咨擅令來京罰
俸一年若已將情由呈明而該督撫提鎮不給

咨者罰俸九月至有事來京仍回原處者呈明
該旗移咨該督撫提鎮仍具文給本人投該任
所上司察對如不候給咨私回或領咨潛往他
處者該隨任子弟照前例議處其各官內有緣
事解任應留任所者如隨任子弟有應質問之
處由接任官申報該上司咨明部旗仍留任所
質問若無可質問其應先歸旗之隨任子弟接
任官不為請咨私令歸旗者降一級留任隨任

子弟不候給咨私離該父兄任所及潛往他處該地方官未經察出申報者罰俸九月其子弟亦照前例議處。五年議準八旗外任武職各官若將任內所生之子過繼與人潛匿別處居住者革職該管上司罰俸一年失察者罰俸六月如於半年內察出揭報者免議。六年奏準隨任子弟至應歸旗之年實有不能相離情由欲留任所者繫提鎮子弟該提鎮自行具奏副

將以下督撫提鎮代為具

奏由部察明實有不能相離情由奏明準其隨任
倘父兄將子弟私留任所及隱瞞年歲不送歸
旗將該員解任親送子弟來京仍降一級調用

○七年

諭向來旗員子弟自幼隨任在外年至十八歲者例
應來京若有欲留任所協辦家務者準督撫代為
題請聽候部議其新授外任之人子弟在京長養

年過十八歲以上者非奉特旨不得隨任此舊例也朕思旗員子弟不許擅隨任所者一則恐在地方滋事一則留京以備該旗當差如外任旗員能嚴加約束為督撫者又不時稽察則皆知守分循理可無慮其多事至該旗佐領若本有可以當差之人而父兄外任者將子弟帶往則本人既可省兩處之食用該佐領閒散之人又得當差支領錢糧以資養贍洵為兩便之道嗣後外任旗員子弟

年至十八歲以上者在外仍令該督撫題請在內
著呈明該都統察奏皆準其隨任其不願隨任者
亦聽之若隨任之後或出署交遊及干與地方之
事著該督撫即行叅奏從重議處欽此。又覆準
外任武職旗人子弟年至十八歲以上請留任
所者若必逐案題奏未免案牘紛繁嗣後將請
留任所情由照例詳明各上司該督撫覈實先
咨部旗存案俟年終由部彙齊人數具題其在

旗初蒞外任官員請將子弟帶往任所者仍由該都統察奏

一休致順治年間定武職老病乞休二品以上具疏自陳三品以下在京由都統奏請在外由將軍等具題交部覈覆。乾隆二年奏準老病乞休各官覈明曾出征臨陣受傷得有功牌者請

旨令其原品休致給以全俸以養餘年其出征並未

禦敵及無功牌者請

旨令其原品休致給以半俸

一患病乾隆七年奏準內外旗員患病該管大員委官確驗酌量給以假期總不得過六月之限如逾限未痊有職任者開闕若世爵將俸祿停支疾病痊之日具呈該旗都統隨旗當差自當差之日起支俸無世爵者候闕補用至額外食俸官亦照此定限有逾限不痊者即行停俸

疾病痊之日仍在原處當差倘無病捏稱患病呈報者將本官降一級調用委驗官罰俸一年出咨之該管官罰俸六月。又奏準王貝勒貝子公屬下護衛典儀親軍校等因病解任後經病痊仍以該員原官補用不準咨補別闕

一雜例康熙二十三年議準武職擅受民辭者降一級調用。又議準武職各官因事夤緣餽送禮物與者受者皆革職提問如餽送雖未收

受並未出首後經發覺將不出首官罰俸一年
○又議準武職各官有將任所民人買為奴僕
者降二級調用縱容家人私買及委託營兵代
買者亦照此例議處失察之該管官降一級留
任○又題準武職見任官員聽任親友招搖詐
騙者革職○三十八年議準武職進京引

見借端科斂所屬官兵以克私橐者革職提問該督
撫提鎮不覆叅者照不揭報貪劣例議處○又

奏準武職上司將所屬末弁如有事故並不揭
叅任意笞辱者罰俸一年笞辱守備以上者降
二級調用。又議準武職宿娼者革職姦家下
有夫之婦者降一級罰俸一年姦軍民妻者革
職強姦軍民妻及姦官員妻者革職治罪和姦
軍民妻者革職拏獲姦夫姦婦私放者罰俸一
年得財者革職。雍正五年議準綠旗官弁暴
厲毆死奴僕者照八旗毆死奴僕例議處。十

一年議準武職因公科斂不入已者為首降一級調用為從罰俸一年該管官不揭報者罰俸九月。乾隆五年奏準武職家人犯贓本官失察者降一級調用。六年奏準在官兵役指稱公事犯贓該管官知情者革職失察贓至十兩以上者降一級留任十兩以下者罰俸一年。又奏準武職各官所用食物工料將價直給發遲延者罰俸一年半給半不給者降二級調用

全不給發者革職折欠價直照數追還。十四
年議準運京銅鉛一到該營汛官弁按站交替

催趙撥兵巡察將入境出境日期申報督撫稽
察若運官無故逗遛及有盜賣情弊亦即據實
申報

倘知情代為隱瞞照徇庇例降三級調用

欽定大清會典則例卷一百十八